



Narendra Modi-i Trinidad & Tobago
PM Kamla dang 'Bihar jala' ta aja

SL-i India nunger football
asayartem meyarir: Stimac

DC Dimapur ajanga ILP atema metetdaksür

Dimapur, Chiteni/July 04 (TYO): Inner Line Permit (ILP) indang Category I aser Category II nung aliba nisungtem jangjatsü aser enumeration atema Office of the Deputy Commissioner, Dimapur ajanga sangdong ka July 3, 2025 nü agütsüogo.

Ibai Home Department indang Political Branch ajanga September 20, 2024 nü sangdong ka nung totuyuba agüja aliba den repsema lir.

Sangdong ajanga ashiba agi, iba inyakyim ya tangsa

tenzüksü. Iba atema nungdakba Forms tem Deputy Commissioner, Dimapur indang office nung aliba ILP Administrative Cell nung angutsü.

Inner Line Permit (ILP) framework kübok nüburtem category balala lemsaba maparen tajungba nung inyaksü asoshi ibai tongtipang administrative mera ka lir, ta Deputy Commissioner, Dimapur, Dr. Tinojongshi Chang, NCS ajanga sangdong nung ashi.

MP S. Supongmeren Jamir-i CSS ochishia inyaksü ayongzük

Kohima, Chiteni/July 04 (TYO): Nagaland nungi Member of Parliament (Lok Sabha) aser Nagaland Pradesh Congress Committee (NPCC) tir S. Supongmeren Jamir-i District Development Coordination and Monitoring Committee (DISHA) ajanga Centrally Sponsored Schemes (CSS) tajungba nung achayangtsü sentong tasen ka Hokulbarnü sangdonga liasü.

Congress Bhavan, Kohima nung NPCC working president Khriedi Theunuo lia osangbener den jembidang, July 9 nü Peren



district nungi tenzüka DISHA senden balala amentsü aser state nung district tenet awajemtsü, ta Jamir-i ashi.

DISHA committees nem CSS mapa kuma inyakba nung amalitep akatsü aser repranga atatsü mapa nunglokja lir, anungji fund diversion mesüdaaksütsüla, grassroots beneficiaries nungi metokmeperi bener aruba angadanga yariteptsüla, ta pai ashi.

"Iba committee ya meita reprangtsüba atema kisüng masü saka amalitep akatsü atema lir. Centrally funded projects tem timi mapa kuma inyaksü asoshi parnok ya Union government aser state tsüngta apu ka ama asütsüla," ta pai ashi.

District-level committee shia nung par tsütsü nungi züngsem pezü nominate süogo aser district commissioners tem den shisa agitepa village council chairmen tem melentepa anioktsü, ta ashi.

Scheme mapa kuma inyakba reprangshitsü aser fund diversions mittsü aser project tem menuba mesüra meshidaki lemsatepba bentettsü asoshi DISHA committees nem tashi agüja lir ta pai ashi.

Project dak sendakba mangatettep indang asüngdangtsü asoshi committee yagi department jaoktsü akok aser quarterly aser emergency reports tem Ministry nem agüja metokmeperi mapang shidak nung benteta aotsü, ta MP S. Supongmeren Jamir-i ashi.

Quarterly reviews alitsü aser dangar memenep tesülen aliba department nem anogo 30 tsüngta ken o bentettsü agütsütsü, ta ashi.

Terenlok maparen asoshi senotsü agütsüba nungi department-i shilem kar meshir ta yimsüng kari tai tongloktsüba indang jembidang, MP (Lok Sabha), S. Supongmeren Jamir-i Village Development Boards (VDBs) aser village council lenirtem dang MGNREGA amala scheme nung metokmeperi aliba

indang osang agütsütsü ayongzüka liasü.

Paisa India Post kübok Gramin Dak Sevak (GDS) recruitment nung local languages aser oshi tem 'third languages' ama inoktsü asoshi meranga inyakba indanga lemsatepa liasü.

"Onoki Chief Minister aser Chief Secretary dang lanurtem maongka tajungba angutsü asoshi ibai mapa kuma inyaksü ayongzüko," ta pai ashi.

Marks tajung nguaka lanur aika national-level competition nung mapa mangur, anungji third language ama local dialect inoksembe ajanga maongka tesatemba agütsütsü, ta pai ashi.

Constitution indang Article 371A dak sendakba tasüngdangba kar langzüdag, Indian Constitution nung iba special provision ajanga Naga nunger sobaliba, ali aser tamangba yimsü tem 'unilateral central laws' nungi kumzüka ayur, ta ashi.

Ajisüaka state sorkari Article 371A nung tashi agüja aliba amshia ali kibur aser nüburtem den jembishinüa terenlok mapa inyaksüla, ta Jamir-i ashi.

"Iba article ya jong dang masü saka terenlok asoshi hadir ka ama amshitsüla aser Article 370 ama iba article agentsü tetsübotsü kecha mali, kechiaser iba ozüng ya Nagaland puti otsü aser maitsü nung tera yanga lir," ta ashi. Pai voters dang pei vote ya pei temeden ka amai kisüng masü saka pei teniyaksü mapa ka ama agizüksüla, ta ayongzük.

Tang aliba sorkar ya nüburtemi shimba dang lir, ajisüaka nüburtem saksalema alitsüla aser sorkar melentsüsa kumra lenir tajungba atema vote agütsütsü renema alitsüla, ta pai ashi.

"Küm pongu nung khi asenoki vote agütsür. Saka tang asoshiibo asenok teinyaksüji len anitsü, asüngdangtsü aser mapa shidak inyadaksütsü ya lir," ta paisa ashi.

Principal Accountant General ajanga inyakyim jangjatsür



Principal Accountant General, Frederick Syiemlieh, IAAS, Sr. DAG (Audit), Kahoto J. Yephthomi, IAAS aser Sr. DAG, Azhar Jamal, IAAS nunger temi July 4, 2025 nü Principal Accountant General office, Kohima nung osangbener den jembidang tangokba noksa ka yangi angur.

Dimapur, Chiteni/July 04 (TYO): Office inyakyim nung mangatettep adoktsüsa osang balala nung tai tonglokja aliba jangjateptsü asoshi Office of the Principal Accountant General (A&E), Nagaland ajanga July 4, 2025 nü osangbener senden ka Principal Accountant General indang office nung ayongzüka liasü.

Iba mapang Principal Accountant General, Frederick Syiemlieh, IAAS, Sr. DAG (Audit), Kahoto J. Yephthomi, IAAS aser Sr. DAG, Azhar Jamal, IAAS nungeri office inyakyim indang lemsatepa liasü.

State Government employees atema Pension Sanctioning Authority ya parnok service aliba Department ya lir, ta parnoki ashi.

Mapa nungi anisüngzük angur temi agütsüba pension papers nung nungdakba maparen ajak renemba sülen pei Department ajanga Office of the Principal Accountant General (A&E), Nagaland dangi yoker. Iba sülen Office of the Principal Accountant General (A&E), Nagaland ajanga pension/family pension tem lemsatsür, ta ashi.

Pension papers ngur mapa inyakba anogo 30 tsüngta Pension Payment Orders renema agütsütsü Office of the Principal Accountant General (A&E), Nagaland indang Citizens' Charter

nung shia lir aser ajak nung yamaji inyaka renemtsür.

Tesüiba ita 12 tsüngta Department balala nungi pension cases 3927 aruogo aser item ronungnungi Department nungi retirement sür ita 0-6 tsüngta cases 2415 agütsü, ita 1-12 sülen cases 922 aser mapa nungi anisüngzük ngur küm ka sülen cases 590 liasü, ta parnoki ashi.

Pension cases 3927 aruba nungi Citizens' Charter nung shia alima ama mapa inyakba anogo 30 tsüngta pension cases 3515 bentettsüogo aser iba mapang pension agütsüba tejangja den mapang, tenüng, contact number aser email ID tejangja website <https://cag.gov.in/ae/nagaland/en> aser Office Notice Board nunga yuja lir, ta ashi.

RTI ken o dak sendakba nung, Public Information Officer aser Assistant Public Information Officer indang tenüng, designations aser contact osangtem website nung aser office indang Reception Cell nung agüja lir, ta ashi.

Entitlement functions dak senakba nung ashishitepba kar danga lira, itemji tekeraba nung bentettsü asoshi Grievances Redressal Officer aser Branch Officers ajunga indang tenüng aser mobile number tem <https://cag.gov.in/ae/nagaland/en> nung lir aser office nung item

ketdangsür ajuruner temi Bodhbarnü dak alaka hopta nung mashi anogo Visitors' Room nung ajurutsü akok.

Pensioner nem mapang shidak nung mapa tajungtiba nung inyaksütsü tangatetba nung lir aser ano inyakyim nung tajungba kumdaaksütsü asoshi shisa lemsatepba pelashishia agizüksü, ta parnoki ashi.

Accounts and Entitlements (GPF, Pension, etc.) dak sendakba nung metokmeperi alibatem osangtsüsang agiteptsü asoshi tsünglanglen agüja aliba yimya nung inyaksü parnoki ashi:

a. State AG website <https://cag.gov.in/ae/nagaland/en> nung agüja aliba Complaint/Suggestion section kübok <https://cag.gov.in/ae/nagaland/en/ae-complaint-suggestion> nung pei metokmeperi indang agütsütettsü, mesüra indang i n d a n g a agaenagaland@cag.gov.in nung agütsütsü akok.

b. Telangzüba nung temulung mesüra, applicant temi CAG office nung Sr. Administrative Officer (Complaint) nem grstate2@cag.gov.in mesüra CPGRAMS ajanga osang agütsütettsü akok.

c. Danga ken o atema State AG website <https://cag.gov.in/ae/nagaland/en> nung "Contact Us" tab nung angutsü.

LSFIS nung workshop ka ayongzüka agi



Dimapur, Chiteni/July 5 (TYO): University of Science & Technology, Meghalaya (USTM) aser Nagaland University aser North East Christian University, Nagaland nung longjemer Hokolbarnü Livingstone Foundation International School, Dimapur nung National Education Policy (NEP) 2020 dak sendakba nung career balala atema maongkatem aliba indang workshop ka ayongzüka agiogo.

Sentong nung o jembiba mapang Chief Secretary (Retired) Nagaland, Alemtemshi Jamir-i ashiba agi, NEP ya shisatsü aser ochi indang basic philosophy dak metaloker lir. Iba yagi ajak nem education agütsüba aser education dak sendakba nung tebendang maliba principle ayimjemer aser iba ajanga career aser skill terenlok nung teyari agütsür. Iba ya India nung educational system melenshiba ka lir.

India ya küm aika colonial system nung inyaksangshia arudar, kong sorkar mapa dang bushiteper. Tanüa Naga nung lanurtemi sorkar mapa ka angutsü atema nükjidong ayur. Pai ashiba agi, NEP benokba sülen education system nung temelenshi tulu adoktsü, ajita asünungdang nüburtem mapa inyaksü aser azüngtsü atema

maongka angutsü aser tangar dak memetaloki alitsü atema renemtettsü. Paisa, lanurtem dang Nagaland ya shishilembaba tsütsü kanga kara renloka aoba state ka kümdaktsütsü atema education policy tasenba ya amshitsü ajungshia liasü.

Paisa, USTM indang mission ya tebendang maliba model ka asüba asoshi tenüngsang agütsü, koba ajanga Northeast aser linük kübok tesem balala nungi kaketshirtem atsüa arur, ta ashi. University ya degree bendentsüba dak dang masü saka skill terenlo, sangrasangji aser alima den sütepa aintsü atema renemshidaktsüba dak rangloker inyaker, koba education policy tasenba nükla lir. Iba amala institution tebilemdangba ajanga iba tesem chichiba melenshidaktsütettsü, ta paisa shisem.

Kasa mapang nung Head of Department Horticulture & In-charge Pro-Vice Chancellor, Nagaland University Medziphema campus, Professor Pauline Alila-i, iba policy ya academics nung temelenshi ka dang masü saka sempet, creativity aser alima den tokteptsü atema tangazükba shidak bena aliba tarutsü atema renema aliba lisopurtem adokdaktsütsü asoshi temelenshi jenjang ka agiba lir,

ta ashi. Laisa, NEP 2020 ajanga kaketshirtem nem koda multidisciplinary learning, vocational training, aser digital education tools tem ajanga tashi agütsür iba indang lemastep.

Maneni lai, NEP 2020 yagi Grade 6 nungi tenzka tasa dak metaloker aliba tangazükba ajungketer, koba internships aser peisasa inyakdanga ajangshiba dak rangloker lir. Iba ya benoka inyakba ajanga theoretical education aser job market nung takhangba na tsüngda tawa aliba süngdaktsütsü meranger.

Pauline Alila-i, "NEP 2020 ya tangazükertem nem tashi meyipa agütsütsü atema lir. Iba ya shisaliok ya ajak atema, atsüshitetba aser tajangzük akaba südaktsütsü atema lir. Iba ajanga kaketshirtem, tesayurtem aser tsürapurtem nem melenshia aoba lima ka nung pei tejangraba shima iba den sütepa aiba den renloka aotsü asoshi tashi agütsütsü," ta ashi. Sentong nung USTM-i HSSLC toppers tem nem senpet aser kuli kaket agüja liasü.

Maneni Vice Chancellor, USTM Professor G.D. Sharma-ia kaketshirtem ajungshi aser Director of Operations & IQAC, USTM Er. Debasish Saha-i career balala dak sendakba nung maongka tem indang presentation ka agütsü.

Mokokchung mozüki asüba maparen reprangshima tetendangba agi

Mokokchung, Chiteni/July 4(TYO): Imkongliba Memorial District Hospital (IMDH) Mokokchung nung tanu Mokokchung District Administration,Ao senden, Ao Kaketshir Mungdang-I National Health Mission (NHM). sentong kübok asüba mapa inyakbatem reprangshima aser tetendangba (hammer testing) North East Engineer, Guwahati puri agia liasü.

Tanü iba tetendangba agiba mapang Additional Deputy Commissioner Mokokchung, Deputy Director,Health & Family Welfare, Medical Superintendent Imkongliba Memorial District Hospital (IMDH), Sub-Divisional Officer (Civil) Mokokchung, Chief Medical Officer Mokokchung, Executive

Engineer Medical Engineering Division (Kohima), PWD (R&B), aser PWD (Housing), Mokokchung nungi aden aser iba den KC Infra Projects Pvt. Ltd., M/s Artain Enterprise Pvt. Ltd. Dimapur nungia liasü.

Tanü iba tetendangba ya State Health Society, Department of Health & Family Welfare, Government of Nagaland, letter No. NL/NHM/07/CW-DH/2018-19/pt- 1/1063 dated July 2, 2025 nung ajemdaker Mokokchung Deputy Commissioner ajanga teteyuba nung inyakba lir.

Tanü koba "Rebound and Hammer test agiogo iba kuli ya anogo 5-7 tsüngda metettsü, anungji iba sülenjiang teinyaktsütemji jangjatsü ta ADC Mkg. Wb.Atsüng Walling ajanga metetdaksü.

K.S Anden den tepila sentong agi

Dimapur, Chiteni/July 4 (TYO): June 30 nü K.S. Anden Konyak, IAS, Commissioner, Nagaland den tepila sentong Commissioner office Kohima nung agiogo.

Iba sentong nung Deputy Commissioner tem, ketdangsür tejentem, department balala nungi külemi inyakterem, Gaonbura, Dobashi, Village Guard nungi lenirtem aser Commissioner Office staff temi shilem agia liasü.

Tepila o jembiba mapang K.S. Anden Konyak-i, pa atema iba sentong ayongzüksüba atema officer aser staff tem dang kanga pelaba lemastep. Paisa, ketdangsür tejentem, Deputy Commissioner tem aser sentong nung shilem agirtem shirnokisa o tajung ashiba den sempet tajung agütsüogo parnok ajak dang kanga pelaba lemsatepa liasü.

Küm 35 sorkar tenzükba wadang nung nokdangba lepa reprangshia jembiba mapang pai tajangshiba balala ajanga pa mapa aser jurila taküm yanglushitsüba indang lemastep.

MLA Sukhato -i Wazeho Cement Plant semdangtsü benok

Dimapur, Chiteni/July 4 (TYO): Committee on Public Undertakings (2025-2026) mendenbuba aser MLA Dr. Sukhato A. Sema-i, Wazeho nung Mini Cement Plant (MCP) jenjang asadangtsü atema July 10 aser 11 nü iba tesem semdangtsü benokogo.

Pa lenisüba nung May 28 nü Committee on Public Undertakings senden ka amenba mapang iba telemtetba ya agia liasü. Ken o dak sendakba nung Public Undertakings Committee züngsem ajak dang iba tesem semdangi arutsü mepeshia metetdaksüogo.

Paisa, par kinungertem dang pa mapa ajak nung nongita yariba atema pelaba lemsatepba den lanur officer tem dang ajemalua nükjidong tajung yur tenzüksü ajungshia liasü.

Mathi 5:9 dak ajemdaker jembiba mapang pai, tenzükba wadang nungi aibelenbatem ajak asoshi tatok meshiba den ajak dang kanga pelaba lemsatepa liasü.

Sentong nungsa Nagaland GBs Federation tenüng nung tir-i o tatsüka jembia aser K. S. Anden Konyak ya kümtem tsüngda parnok tenongiter aser lensayur ka liasü ta ashiba den pa tarutsü temaotsü nung aotsü imlaja ataba lemsatep.

Nagaland Dobashis Association tenüng nung tir-i, Anden-i masetshi-i nongita yariba lokti-i kodanga mamatoktsü ta ashi. "Mapa nungi anenba ya tatembang masü saka lokti nem maneni shisatsü agütsütsü atema tetenzük ka lir," ta pai ashi.

Sentong nung Commandant, Village Guards, Luensang, H. Mukem Shio, NPS-ia Village Guards tenüng nung o jembia liasü.

Kasa mapang nung Deputy Commissioner, Mokokchung, Ajit Kumar Verma, IAS-i, Deputy Commissioner tem tenüng nung o jembia aser Joint Commissioner, Nokchasashi, NCS-i officers aser staff tem tenüng nung jembia liasü. Maneni Commissioner & Secretary, LR Department, Dr. Zasekuolie Chusi, IAS-ia o tatsüka jembia liasü.

Iba sentong ya Warren Holohon Yephthomi, Deputy Commissioner (HQ), lenisüba nung agi aser Mhonchumo S. Lotha, Pastor, Kohima Lotha Baptist Church-i sarasademer tenzüka liasü. Maneni sentong nung Moasunep K. Jingru, NCS, EAC, Chiephobozou aser Commissioner's Office staff temi ken aten.

Wokha DC-i gari senzügenpong indang metetdaksü

Dimapur, Chiteni/July 4 (TYO): Wokha jila nung gari senzügenpong tali akümba ajanga tetsükdaktsü adokba dak sendakba nung Wokha jila ajanga National Highway nung gari kecha tetsükdaktsü makai senzügenpongtsü aser nüburtem teküzmükba kübok toktsütsü atema Wokha DC Vineet kumar-i tetuyuba kar agütsüogo.

Khen atema NH nung Police Point nungi DC Office Junction, Main Police Point nungi District Planning & Machinery (Etsutchukha Junction) Office aser Main Police Point nungi Hornbil Hotel tashi lenmang külen dang gari anentsü melatsü.

Jila kübok National Highway nung tanungba tesemtem nung gari kecha anentsü memelatsü.

National Highway nung gari

nungi khu agizükba ya anepdang 4 nungi 7 ako tashi dang melatsü.

Anepang 7 ako nungi nikongtsütsü 4 ako tashi lenmang teyong nung commercial garitem anena khu belenoktsü aser agizüktsü memelatsü.

National Highway nung ozüng alema stall tem, kiojen yanglua aliba mesüra oset balala yua lenmang atsünga arur aliba ajak agintsüla.

Tetsüng lenmang, kilentsü koba National Highway nung shilem ka lir, iba ya teti sadem sadema toktsütsüla. Garage, saw mill amala dokantemi NH nung nüburtem ali matsüngtsüla. NH nung "Reserved Parking" mayutsüla, kong pavement, footpath, drainage amala densema lir.

Town council-i mapangshia

asadanga alitsü aser ali atsünga arur aliba ajunga agintsütsü.

Tetuyuba sülen manidakertem nem Motor Vehicles Act, 1988 aser Nagaland Road Safety Rules dak ajemdaker tapet temerenshi agütsütsü.

District Administration, District Transport Office aser Town Council den longjemer Police Department-i temzüng ozüngtem ajang ajanga benoka inyaksangshitsü.

Ken o dak sendaka aliba department aser nüburtem dang nüburtem küzmükba toktsütsü aser tetsükdaktsü kecha makai senzügenpongdaktsütsü atema tetuyuba sülen tashi anga anidaktsü DC-isa metetdaksüogo. Iba tetuyuba ya osang tejangja ka magütsü tashi July 7 nü nungi benoka inyaksagshitsü.

Narendra Modi-i Trinidad & Tobago PM Kamla dang 'Bihar jala' ta aja



July 04, 2025 nü Couva, Trinidad & Tobago nung National Cycling Velodrome sentong nung Ato kilonser, Narendra Modi aser Trinidad & Tobago Ato kilonser, Kamla Persad-Bissessar na adenba noksa nung angur.

New Delhi, Chiteni/July 04 (Agencies): Hokolbarnü Ato kilonser Narendra Modi-i Trinidad & Tobago Ato kilonser, Kamla Persad-Bissessar ajuru, aser pai Kamla ya "Bihar ki Beti" (Bihar jala) ta aja.

Kamla Persad tetsü-tebou nungertem ya akhidang Bihar kübok Buxar district nungi liasü.

Trinidad & Tobago nung India nungertem den sentong ka agidang Kamla Persad Bissessar-i Ato kilonser Modi nem tenüngsang agütsü aser pai (Modi) züluba kaket 'Aankh Aa Dhanya Chhe' nungi lai sangro ka zünga liasü.

Kamla Persad-Bissessar ya

Trinidad & Tobago nung tetsürtem rongnungibo mezüngbuba Ato kilonser lir. La ya 1952 küm April 4 nü Siparia, southern Trinidad nung aso. Tamalen la Attorney General aser opposition lenir-a inyaka liasü.

2010 küm January ita nungi la united national congress (UNC) nung lenir lir.

Yimtenren nung majemokdang la municipal council nung inyaka liasü aser 1995 küm Saparia nungi MP aküm. Tamalen la Attorney General, Minister of Legal Affairs aser Education Minister densema cabinet menden balala

nung liasü.

Kamla Persad-Bissessar tetsü-tebou nungertem ya akhidang Bihar nung Buxar district kübok Bhelupur yimdak nungi liasü. 2012 küm lai iba yimtsüng semdangogo.

India-Trinidad na tsüngda tesendaktep tashi itdaksüba nung shilem tajung agiba atema 2012 küm taoba mapang India Tir, Pratibha Patil-i la nem Pravasi Bharatiya Samman award agüja liasü. Iba award ya India-i bendangalen alirtem nem agütsüba tematiba award lir.

Kamla Persad-Bissessar-i University of West Indies nungi Bachelor of Arts aser Diploma in Education renema liasü, iba sülen Hugh Wooding Law School nungi law degree angu.

2006 küm lai Trinidad nung aliba Arthur Lok Jack Graduate School of Business nungi Executive MBA renema liasü.

Lai yimtenren nung majemokdang University of West Indies aser Jamaica nung aliba St Andrew High School na nung küm trok tesayur inyak aser Jamaica College of Insurance nunga Consultant Lecturer inyaka liasü.

Operation Sindoor mapang China-i Pak den osang lemsatep

New Delhi, July 04 (Agencies): Hokolbarnü Deputy chief of army staff (capability development & sustenance), Lieutenant General, Rahul R Singh-i, Operation Sindoor mapang nung China-i Pakistan den 'live' osangtem lemsatep, ta metetdaksü.

FICCI-i ayongzükbä 'New Age Military Technologies' sentong nung jembidang Lt Gen Singh-i, "DGMO level nung ken o tejembidak mapang nunga China-i asenok dak sendakba osang balala Pakistan nem metetdakja liasü," ta metetdaksü.

Lt general Singh-isa, "Operation Sindoor mapang nung India-i tsükchir asem den raraa liasü. Arrtsülen tsükchir ka den raraba mapang nung ano tsükchir ana liasü, atangji tsükchir asem liasü. Tejaklen Pakistan liasü aser China-i akokba tashi parnok yari. Pakistan ket nung aliba raraba hadir shilem 81 bo China nung indang liasü. China-i tangar hadirtem anema parnok hadir tendanga liasü, anungji

ibaji parnok atema 'live laboratory' amai liasü," ta ashi.

"Ano külen Turkey-ia tongtimbang shilem ka agia Pakistan yari; parnoki Pakistan nem Bayraktar agütsü. Raraba mapang nung onoki tangar drones aika angu," ta pai ashi.

Deputy army chief-isa, tarutsü nung linük ana tsüngda ano rara adokra Pakistan-i India nung nütsüng aika aliba tesemtem-a amaktsüa akok, ta ashi.

"Tawa raraba mapang nung (Pakistan-i) nütsüng aliba tesem mamak, ajisüaka tarutsü nungbo asenoki iba atemaji renema alitsüla," ta pai ashi.

April 22 nü Pakistan nungi kiralongrartemi Jammu & Kashmir kübok Pahalgam amakba sülen May 7 nü Indian army temi Operation Sindoor kübok Pakistan aser Pakistan occupied Kashmir nung kiralongrartem camp 9 amak. Iba mapang nungjagi tenzüka India aser Pakistan na tsüngda anogo aika raraba sülen Pakistan-i mepishiba nung ajemdaker linük ana tsüngda rara anena liasü.



Kolkata, July 04, 2025: Tawa Kolkata nung tebur telok kati South Calcutta Law College nung azünger ka tashiyim amshia raksatsüba ken o nung tai tonglokja alirtem ozüng alema inyakba tesemi anir arudang tangokba noksa nung angur.

Himachal Pradesh nung nisung 37 süogo

New Delhi, July 04 (Agencies): Himachal Pradesh nung anogo aika tzünglu maneni aruba ajanga lendong balala nung nisung 37 süogo, ta ketdangsertemi metetdaksü.

State nung tzünglu maneni aruba ajanga sen crore 400 shi jenjang kiojen raksaogo, ta Himachal Pradesh State Disaster Management Authority-i metetdaksü.

Osangbenertem den jembidang State Disaster Management Authority & Revenue Department Special Secretary, DC Rana-i, "Tang tashi nung sen crore 400 shi jenjang takoksa anguba onoki asadangteter, ajisüaka iba dang nungjagi teimba asütsüa akok. Tang onok atema tongtibatiba teinyaktsüji nisung bushiba, kümzükbä maparen inyakba aser kiojen

tanaben yangershitsü atema lir," ta metetdaksü.

Tsüngsang-mopung kanga mejungi lia India Meteorological Department (IMD)-i July 7 tashi ano state nung tzünglu maneni arutsü, ta tekümdangtsü metetdaksüogo.

Tang tashi nung tzünglu dak sendakba lendong balala nung nisung 37 süogo aser nisung aika samar mangur, ta ketdangsertemi metetdaksü.

State nung gari lenmang 250 dak tali mokdangogo, electricity transformers 500 dak tali raksaogo aser tzü tajemtsü schemes 700 dak tema raksaogo.

Tang tashi nungbo tsüngsang-mopung agi tamajungtiba kongshiba district ji Mandi lir. Iba district nung nisung 40 dak tali samaogo aser gari lenmang teimbaka raksaogo. Anentsüh agi

lenmang aika mokdangba ajanga chiyungtsü shibelenba lenmang shibanga nübur aika timtemdar.

Nüburtem jenokdaksütsü atema Relief camps aika amenoka lir aser tzümetsüng agi kongshiba tesemtem nung Indian Air Force tayimtsü ajanga chiyungtsü belena tsükdaksür.

Manali nung dang masü saka Shimla nunga tzümetsüng lendong lir. School aika tzü agi metsüngbangogo aser kaketshirtem kanga timtemdar.

Local administration, police, Home Guards, SDRF aser NDRF sepaitemi state tesem balala nung samaba nisungtem bushidar. Ano taruba anogo asem-pezü tzünglu maneni arutsü, ta IMD-i sangdongba sülen ketdangsertemi telemtetba balala agia tensa mita reprangdar.

Kerala nung shiranger ana dak Nipah virus temaitsü putetogo

New Delhi, July 04 (Agencies): Kerala nung nisung ana dak Nipah virus tashidak temaitsü putetba sülen Hokolbarnü Kerala nung health ketdangsertemi district asem nung tekümdangtsü osang metetdaksüogo.

Health ketdangsertemi Kerala kübok Kozhikode, Malappuram aser Palakkad district tem nung iba tashidak atema kümdera alitsü metetdaksü.

Kozhikode aser Malappuram na nung sorkar indang medical college tem nung tashidak balala tendangba mapang nung nisung ana dak Nipah virus temaitsü putet.

Nisung ana dak nungi agizükba samples ji jangjatsü atema Pune nung aliba National Institute of Virology-i bener yokogo, ta ketdangsertemi metetdaksü.

Hokolbarnü rongdak senden

ka ayongzüka amenba sülen Kerala Health Minister, Veena George-i, "Nipah tashidak atema telatetbatem kübok iba tashidak nokdangtsü atema onoki mera agia inyakdar," ta metetdaksü.

Kozhikode, Malappuram aser Palakkad district tem nung special team 26 tentetogo aser parnoki iba tashidak mita reprangtsü aser nüburtem nem osangtsüsang metetdaksütsü.

District collectors danga containment zones renemtsü aser nüburtem nem iba tashidak indang rajemdaksütsü atema tetuyuba agütsüogo.

Nüburtem den yariteptsü aser tongteprateptsü atema local helplines-a amenokogo.

Ketdangsertem dang, tesüiba hopta ishika tsüngda mejangjaba tashidak agi asürtem indang kuli bushisüngdangtsü tetuyuba agütsüogo.



July 04, 2025 nü Uttarakhand kübok Uttarkashi district nung tzümetsüng lendong nung samaba nisungtem bushidang tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 05, 2025

Nagaland nung ya kechi junger ?

Atangji, Nagaland majungba indang jembi agi lakogo, anungji tamajungtem ajak mangu aser mangashi amai toktsür, Nagaland nung tajung tajung reprangteta jembitsü meranger. Ajisüaka, Nagaland nung tajungji kija mesüra nija meyong ki aser kima tashi ajungba dak alaka yimkong meyongbo kecha tajung mali kümogo. Aji oda, gari lenmanga nija meyong süra kanga junga yanglur angur saka yimkong lenmangbo, tang tzünglu arudang ya balaka yimti yimdong nung gari masü rong nung senzüsüsa motzü agi awatsüng kümer, talisa school-i aoer tanurtem aika gari-a maka aser rong-a maka aser tetsüng agia ajanga moutet ta timtemba angur. Kasaji, Nagaland dak langka tajung reprangtetnua meranga alidang, yimtaklitem nem ayangba sen center government nungi yokba ser nung, iba sen nung jagi shilem tulubalenka state government-i meshiba angashir. Ajia mangashi kümer ano Nagaland dak langkabosa tajung reprangtetsü meranga alidang, ano külen nungi center government nungi sensakertem nem jang angati lema agütsüsü asoshi yokba nungi yimtak yimteni seret matu agütsüba dang masü saka sen dena meshiba osang angashir. Aji oda, Nagaland dak kangshia tajung reprangtetsü merangyonga kaketrejutema nija meyong süra junger saka yimkong meyong government school nungbo tazünger mali tesayurtem aikati sayuner saka tazünger mali. Kasaji, mozü kitema nija meyong süra junger saka yimkong meyong government mozü kitem nungbo shiranger taküm kümzüksüsa nüngdakba oset aser nisung mali, anungji yimkong meyong mozü kidang makok nija meyong mozü kidangi yoker. Aji oda, yimkong ajungtsü atema lapokba industry, Institution aser kiojenbo kar yanglupeter angutsü aser kar terenembo renemer saka mamshitet arem kümdaktsüba angutsü. Aji oda, district-bo aküm saka tular kidang aser office nung ayutsü menden aser yiptena malitet, tangar bendangertem dang dena meshiba angur. Aji oda, Nagaland indang tajung jembinüyonga, government dena meshimetsür kümra, kechi ajungba indang jembitsü ? Joko, Dimapur nungbo government-a mali amai kümogo aser yamai dang yutsü nungbo October ita tashi nungbo Dimapur yimti yimdong nungbo lenmang mangutsü. Nagaland dak tajung mangu, Dimapur majungba indang jembidang, Dimapur ama ka, Nagaland nung yimsüsür aser takar ajak alidak aser anogo shia süidak yimti dena yamai kibur mali amai aküm nungbo, tanga tsüket nung aliba district aser yimtitem jenjangbo komaka alitsü ta bilemer mebilemjemteter. Item tamajungtemji asenok shisatsü majungba ajanga atalokbatem lir. Asenoki asen alidak yimti kodaser topur ajungtsü ta bilemer masü saka ozü ki aser ozü kima kodaser topur ajungtsü ta dang bilemer. Kasaji, asenoki kodaser nübortem takar kümdaktsütsü ta bilemer masü saka kodaser ni takar akümtsü ta dang bilema shitak asü meshitaklenar kecha mali, tangu dang ngura aser takok dang kokra, asen kija meyong masü saka tangar meyonga dena bendena takar akümtsü merangtsü. Asenoki Laishiba nung ali rongsen tulu dangbo tenüng tajung shimtetba tajungba ta ashiba ya mamanger, anungji asenoki ochishia ki tamajung ka nung alitsü agibo ochimashi kuma ki tajung nung alitsüabajiang shimteter. Aji oda, auer ashir ajayonga ojang, ni dang karabang ta asenoki bilemer. Iba jagi Nagaland majunger. Ashi, ni makayonga Nagaland jungra ojang aser ni timtemyonga ozü nübortem anisüngzüka lira aji agi ni tepelashi ta bilemba tangatetba Nagaland nung alir nütsüng nübo aser yimsüsür dak ali asübo, Nagaland-a topur jungjunga yanglutetla aser Nagaland nung alir Naga nungertema ochishir, awashi temetet, inyaker chiyongba nübortem, tongmelang aser teindang nisungtem ta tangari jembila. Tenüng tajungji aji lir. Item dang jagibo ajak arunütsü aser item denjibo alima nung alir ajaki külem ser business-a inyaknütsü aser Tsüngrem mapa nunga külem ser tenzüknütsü. Atangji, Nagaland ajungtsü majungtsüji asen mulung, asenoki dang mulungra, Nagaland ajungtsüba yabo mapang magitsü.

OLEMSABANG

Alu aser shishidak revival ajanga temelenshi

Wati Longchar (Ehkranipathar)

(Maneni yashi adok nungi...)

Tanabuba o intepbaji shishilemba dak (market place) amshia angur - kechi shinür? Shishidak ya tajangzük, sen aser takar akümtsü merangba jaka ka. Shishidak shirnoki arakmoka ayu parnokji kanga takar aküm. Tayoker aser talir na pronglai ashioktsütsü meranger, tashiyim amshir, aser tajangzük asoshi mapa tamajung inyakkak jaka ka lir. Shishidakji nisung tajung, tamajung, yi jemer, tamachitsü mozü achir / tayoker, teküp ayoker / talir, rakzükrakter, auyar, shilu balala, tamanger telok balala, oshi balala jembiir ajak alir. Shishidakji pei ajungtsü dang asa-a, sen sen dang bushia maparen ajak inyakra kotak yimli majangzükttetsü ta ashir. Maneni Yisui lokti yanglushitsü indang sayur ta metetdi.

Tanü alu tetezü na/ner kibong mesütsü kechi mapa inyaker iba dangji ajar ta angatetdi. Ibai office, arogo, aser tanga mapa balala aika ta metetdi. Shishidak tetezü meimchir ajak meyoktepa alidak kong shishilemba aser rongsen bushiba lenmang maparen balala inyakkak ta angatetdi. Yangji ochi inyakba ajanga revival adokdakjang ta shir. Alu aser shishidakji Khristan kulisüba lushi / kimung ta sayur.

Lokti Yanglushiba Tenyaba Mapa

Lokti yanglushitsü asoshi putu balala nung arogoi tenyaba mapa balala inyakba angur. 18th aser 19th century putu, temesüng nungeri alima balala dangi oa arogo tenzüka aoba den Roman Catholic aser Protestant arogo anapronglai education, charity aser medical mission inyakba angur. Missionary karibo lokti temenen anema, tat. agi, William Carey-i sati practice (kinungbu asüandang kinungtsü rongseta südaktsüba), aser Clerk-ia alar ayuba, tokolak bushiba, tetsür züngtokba, ano aika, anema tai ta ashi aser temelenshi asoshi inyak. Ano Protestant missionary-temi Laishiba ajak nem züngdaktsütsü asoshi Laishiba pei tetsü oshi nung meyip, osep (dictionary) zulu. Arogo kari industrial mission tenzü, kari yimtsüng nung alir rongsen jenjang nung ajungkettsü atema aluyimba mission tenzü. Tanü lokti yanglushitsü asoshi arogotemi yamala mesükba tenyaba mapa balala inyakkak. Tsüngrem tenüng sangdi.

Temalen YSS nung China nungeri alima meimchir shia Laishiba züngdaktsütsü nükjidong nung Amity Printing Press tenzüka lemsatepogo. 1988 nungi April 30, 2024 tashi nung Laishiba 260,910,073 oshi 229 nung, country 158 asoshi menünogo. China mission nukjidong kaji Laishiba ajanga meimchir lungjemdaktsütsü, Yisu Khrista Osangtajung meimchir ajak nem züngdaktsütsü nükjidong ta ashi. Ano parnoki lanur addiction balala (mozü, yi, mobile, etc) nungi jenbua lidaktsütsü, saisabong ajanga nüngtugu kümdaktsüba den rongsen jenjang tajungba kümdaktsütsü, aser China saisabong ajanga alimai tali metetdaktsütsü asoshi ping-pong, bikmenten (Aor olasü nung), "Amity Cup" tenzü. Tanü alima aika nungi arua shilem agir aser iba mapang lanurtem aika dang Khrista Osangtajung sayur. Lanurtem taküm melenshidaktsüba aser China saisapong nung nungtugu kümdaktsüba mapa tajung ngua Chinese Government-i teyari tulu agütsür aser Govt. aser arogo tesentaktep tali adokdaktsür ta ashi.

Asenoki mapa aika inyak nung takok mangutsü, saka ibai ajanga nübur tejekleni anitsü ta asüba tenyaba mapa ka tenzü nung ajungtsü aser Naga lima alimai meteta akümtsü. Tanü Naga nunger, India nung aser lokti rangben taküm nung temelenshi adokdaktsütsü kobala tenyaba mapa ka Ao Mungdangi anir inyaktsü?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sayutsüngir asür DGS Dhinakaran tenüng nung chiyongdaksü



Jesus Class ministry tenzüksang DGS Dhinakaran küm 90 ajungba tenüng nung Dimapur railway station nung sensakertem nem chiyongtsü lema agütsüba noksa nung angur (Dimapur, July 04, 2025).

Dimapur, July 04 (TYO) : Jesus Calls ministry tenzüksang Tsüngrem nisung, nüngtugu sayutsüngir DGS Dhinakaran pa alima nung taküm meliaka, pa sor küm 90 ajungba tenüng nung Tsüngrem tenüngsanga par chirnur aser Jesus Calls Ministry nung inyaktermi linük nung tesem balala nung talidak ki maka aser chiyongtsüa maka yimdong nung dang lia senzürtem nem chiyongtsü agütsüba sentong ka agidagi aser Nagaland nunga tanü Hokolbar nikongdan g train station nung Yisu temeim indang sayutsüngiba sentong mapang tatsüka agir külen chiyongtsü lema chiyongdaksüogo.

Kasa sentong ya yashi Chümoukedima nunga ayongzüka liasü aser yangjia nisung aika arua temang shi

atema dang masü saka tanela chiyongtsüa nguogo.

Tanü nikongdang Dimapur Railway station nung sensakertem nem chiyongtsü agüja sarasademtsüba sentong nung Wb.Maongwati Aier IAS (Rtd)-i Tsüngrem temeim o lemsatep. Iba sentong nung Final Harvest Church, Dimapur purtemi yaritepa liasü. Iba sentong nung ken tena Yisu temeim indang ashiba mapang meshimetsür aser sensakertem adenshia teka maa Halleluya ta ola adoka shilem agia liasü. Item sentongtem ajak ya Jesus Calls ministry nung North East Region nung Regional Manager Rev.Sathrach Billygraham-i achaayanga akar.

DGS Dhinakaran ya tamasabo Bank nung inyaker ka liasü saka pa temulung meyiper pai sensakertem dang Tsüngrem

osang tajung ashitsü tenzüik aser pa ajanga aika Yisu dak amanga temulung meyip aser pa nübortem asoshi nüngtugu sayutsüngir ka aküm.

Pai 1986 kümbo Coimbatore,Tamil Nadu nung Engeneering college ka lapok aser ibaji tangbo Karunya Deemed University kümogo. Iba university ya ali acre 700 nung amenoka lir aser yangi Enginerig aser Technology dang masü saka tangbo Agriculture, Media, Management, Arts, Sceince aser Himanities subject-tem sayur.

Tang Jesus Calls ministry ya DGS Dhinakaran'er jabaso Dr.Paul Dhinakaran lenisüba nung alima tesem balala nung Tsüngrem mapa inyaker, Dr.Paul Dhinakaran ya-a tebu amato Tsüngrem ain aser sempet aketba sayutsüngir ka lir.

ANOGO ABEN TSÜNGREM DEN

Tsüngrem Ne Den Lir

Yamai temeranger Kibubai ashir: "Item anogo nung ya oda ataloktsü, kintem oshi ajak nungi nisung teri Yihuda nunger ka dak sü nung sotter ashitsü, onok nenok den aotsü, kechiyong Tsüngrem nenok den lir ta onoki angashiogo. Zak. 8:23.

Tsüngremi Pa nüburtem Tanela Temeshi agi sünga lidaktsüner idangji tangari Pa ain parnok dak aliba metettsü.

Ainkar Zakaria ajanga, Tsüngremi Pa nüburten dang parnok pa atenba balaka sayutsüla ta ashi. Tsüngremer nüburi Pa anasa jajara, alima ajungai parnoki Tsüngrem metetta lir ta metettsü. Nüburi Tsüngrem chir ka ngura, parnoki pa/la den alitsü yongyatsü kechiaser yamaji aliba ajanga parnoka Tsüngrem anasa alitsü ta parnoki bilemtsü. Tekong 20 nungi 22 tashi nung kintem teyongya alidang ainkari ashir.

Tangar ne tsütsüi anir arutsüsa Khrista akaba kuli ne taküm nung alitsüla. Parnoki parnok chirtem ne chirtem den lidaktsünütsü kechiaser ner chirtem Tsüngrem metetba nung indaktsü. Mapa agütsürtemi na parnok mapa nung anioktsütsü, aser tanishir südaktsünütsü kechiaser parnoki na Tsüngrem den tsüngchir süa aliba metet. Ne taküm aser kibong tangar atsüa aruba tashi (magnetic) ka ama alitsüla. Parnoki ne den aser ner kibong nung Tsüngrem dena lir ta bilemba ama ne taküm aser kibong alitsüla. Nai Khrista ne den aliba kuli tali sayuli, nüburtem tali Pa dangi atsür aruli ta asütsü.

Oklahomanung jail ka nung nisung 400 dak temai Khrista agizük



July 04, 2025: Tawa Oklahoma nung aliba jail ka nung Pastor Paul Daugherty leniba nung tekülem sentong ka agiba sülen tepuokdak alir nisung 400 dak temai Khrista agizük.

Iba sentong nungji tepuokdak alir nisung 700 dak temai Tsüngrem külema liasü.

Iba sentong nungji volunteers 32-i yaritepa chiyungtsü agütsüba den külemi Laishiba 700 aser Bible study kaket 1,300 agüja liasü.

Tulsa, Oklahoma nung aliba Victory Christian Center nung pastor Paul-i, "Jail tem nung alu aruhtsü jenti lir ta ni meteta liasü, aser ibaji

Tsüngrem temeim ajanga dang inyaktet. Yimti nung aliba Arogo kari dang jail ministry inyaker," ta metetdaksü.

Paisa, Oklahoma Governor Kevin Stitt aser pai aniba team ajurutsü atema Tsüngremi pa nem maongka agütsü aser state nung operating officer tongti, Brian Bobek ajurutsü atema-a pai maongka angu, ta pastor-i ashi.

"Pa ya Khristan ka liasü, aser pai Arogo ka nung adentsü tebilemba liasü. Ajioda pai ozü Arogo tekülem kidangi aru tenzüka liasü," ta pastor Paul-i ashi.

Bobek-ia pastor Paul

Daughtery dang jail outreach tenzüktsü ajungshi. Iba mapang nungji pastor-i Bobek dang, "Ni nisung 10-20 atema dangbo tekülem sentong maginer saka jail nung alir ajak ayongdena sentong aginer," ta ashi.

Ajioda pastor-i anir mezüngbuba outreach sentongji June 23 nü John H. Lilley Jail nung agia liasü.

"Iba sentong nungji nisung 100-200 shi dang adentsü ta onoki imlaa liasü, ajisüaka tepuokdak alir 751 iba sentong nungji aden aser ni parnok den Khrista osangtajung lemsatepa liasü," ta pai metetdaksü.

US nung Christians United for Israel conference anema longkak ait



Washington DC, July 03 (Agencies): US nung institutions balala nungi nisung 800 dak tali adenshir Christians United for Israel (CUFI) conference anema longkak aitogo.

CUFI ya Christian Zionist group ka lir aser iba telok ya US nung Israel pusemba telok tulutiba lir.

CUFI conference ya küm shia Washington DC nung agir. US nung yimten nem Israel pusemdaktsütsü nükjidong nung iba conference agir.

Mongolbarnü CUFI conference anema longkak aiter nisung 50 dak tali puogo. Anogo asemnü conference ya June 29 nungi July 1 tashi agiogo.

Tending Futures executive director, Assata Deko Cruz-i

sangdong ka ajanga, "CUFI indang yimtenren project ya foreign policy ka dang masü saka theological aser ali atsünga agiba lir," ta metetdaksü.

Paisa, "CUFI-i akhi shin otem ataloktsü atema Palestine nungertemji meindoktsü tangatetba nung inyaker," ta metetdaksü.

Yihuda nunger tesayur Abby Stein-ia, "Khristan Nationalism aser Khristan Zionism ya Palestine nunger aser Israel nunger taküm aser temeden atema amokmeren ka lir," ta ashi.

CUFI ya televangelist John Hagee-i tentetba lir aser tang iba telok nung züngsem million 11 dak tema lir. CUFI ya alima nung Zionist organisation tulutiba lir.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tepsa

- (v) long ama temerang oset tanük kümdaktsüba (pound into pieces)
* Long tuluka mapa inyakertemi tepsa.

Tepsep

- (v) mi jangrua aliba sepdaktsü (extinguish, douse)
* Yimkong oagi mirokmi oa aliba tepsep.

OLONG PAITEP # 7200

	1			2						3
4			5							
					6					
7							8			
9							10		11	
12										
							13			
14										

TIPIEN

2. Asangur mapang
4. Mesükteper
6. Tsünpok
7. Ajidaktsü
8. Shiruru aputsü ayuba
9. Ya
10. Yangkhu
12. Alaktetta / Tesa
13. Lenmang aika
14. Aou nung chiyongtsü asenba

LANGTSÜNGLEN

1. Yimya liro / Inyaksangshi - (5)
3. Aji agi - (7)
5. Ajitet - (4)
6. Mesünem / Chirar - (7)
7. Nguyutep - (7)
10. Ki meketbangba - (4)
11. Balala aküm - (5)

OLONG PAITEP # 7199 TELANGZÜBA

TIPIEN :

1. Rebeka, 4. Adam, 6. Yohan,
9. Zü, 12. Sayutsünger, 15. Ku,
16. Naman, 17. Abel, 18. Samuel.

LANGTSÜNGLEN :

2. Kan, 3. IM, 5. Anüng, 7. Amsü,
8. Yosef, 10. Sara, 11. Isak,
13. Yakob, 14. Nana, 16. Noa, 17. Am.

NAI-A YA METETTER MA



BALLPOINT PEN ya

Biro Brothers-i 1931 küm yanglutet

Meghalaya HC-i yokyatsüyar anintsü atema special officer ka shim



Shillong, Chiteni/July 4 (Agencies): Shillong kübok Khyndailad tesem, koba dang Police Bazar ta ajar iba tesem nungi tang lendi nung yokyatsüyarтем aninba inyakba achaayangtsü atema Meghalaya High Court-i senior advocate Subhasis Chakrawarty, Special Officer ama shimogo.

Shillong Roadside Hawkers Association-i ken o süoki ia bilemba ashishiba mapang tang iba jenjang ya agiogo. Hawkers Association-i ashiba agi, lendi nung yokyatsüyarтем ya maneni yokyatsüyatsü atema tanga tesem ka magütsüi anindar.

Chief Justice I P Mukerji aser Justice W Diengdoh nati kümtetba division bench kati July 3 nü Public Interest Litigation (PIL) ka angdangba mapang Special Officer ya

shima liasü.

Okadaki Special Officer dang yokyatsüyarтем aninba inyakyim sülen tashi anga anidaktsütsü atema jenjang agitsü aser maparen benoka inyakba mapang kecha lendong madoki yimjung nung dang inyaksangshitsü atema tetuyuba agütsüogo.

Khyndailad ya yimti nung mazüngtiba shishilembadak aser alima penzürttem metiba tesem ka lir, kong hotel, restaurant, aser retail outlet aika lir. Okdakisa yokyatsüyarтем temeden aser inyakyim liromedemtsü nüngdakba lemsatepa liasü.

Special Officer nem item yokyatsüyarтем aninba inyakyim ajak achaayangtsü, licensed vendors tem list bendentsü aser hawkers' association aser local ketdangsürttem den

tongtepratepa inyaktsü nongloksüogo.

Yokyatsüyarтем tanga tesem kati belener mao tsüngda okadaki license bena alirtem dang 12:30 pm nungi 2 pm aser 7:30 pm nungi 9 pm tashi dang yokyatsüyatsü asoshi temelaba agütsüogo, ajia parnoki gari aser nüburttem senzüsenspong minprong masü nungdang shishilembatsü melatsü. License maliba yokyatsüyarтем shishilembatsü memelatsü.

Okadakisa, license malirtem apply asütsü temelaba agütsüogo.

State sorkari yokyatsüyarтем anintsü atema tesem asem bushiteta lir aser parnok ajak nem relocation allowance 20,000 agütsütsü nangzükogo. Special Officer dang August 5 nü tashi nungbo osang ka agütsütsü tetuyuba agütsüogo.

Assam nung Police officer ka mapa nungi anentsü

Guwahati, Chiteni/July 4 (Agencies): Osang bener ana dak azükba ken o nung busisüngdang mashiyimi asüba atema Assam kübok Sonitpur district nung police officer ka mapa nungi anentsüogo.

Iba lendong ya July 29 nü Dhekiajuli tesem nung atalok, kong Guwahati nung amenoker aliba news channel ND24 indang osangbener Bimaljyoti Nath aser Bipul Phoyel na densema liasü.

Tena ya ozüng alema mining mapa benoka inyakba indang osang ka agütsüba sülen meyipa aruba mapang mejangjaba nisungtem maka kanga mejungi yiruja liasü.

Raikhasmari police outpost

indang officer-in-charge Charu Rajbongshi ya mezüng Bodhbarnü mapa nungi agin. Iba sülen pa mapa nungi suspend sütsüogo, ta Sonitpur Additional Superintendent of Police (ASP) Madhurima Das-i ashi.

Iba tatalokba sülen tesem aika nung nüburttemi ola adok tenzük aser Dhekiajuli Press Club aser All Bodo Students Union nati anir aibelena alitem pua merenshitsü khanga longkak aita liasü. Ken o dak sendakba nung temulung melemi bilemer parnok pezü puogo, saka nisung asembo bail nung chiokogo aser iba ajanga Rajbongshi-i bushisüngdang shitak masüba indang taitsüba

adoka liasü.

Aija alirtem rongnung tongtiba Dilip Nath tang tashi mangu lir aser pa maneni police dang nungi jenshia senzüdar. Par jabaso tang judicial custody nung lir.

Ketdangsürttemi Udalguri district nung Rowta anasa Nath-i amshiba gari ka ngutetogo. Nath maneni bushidar, ta ASP Das-i ashiba den, bushisüngdanga aoba mapang osang talila maneni agütsüyonga aotsü, ta shisem.

Nath ya news portal ka den sendaktepba lir aser pai sorkar department balala dang Right to Information (RTI) applications file süa aruba mangaoka lir.

Manipur nung nisung ka prangbong injang bener lia apu

Imphal, Chiteni/July 4 (Agencies): Manipur nung Imphal East district police-i Brehostibar aonung arishi küm 41 tain tebur ka puogo. Meita aoba mapang iba nisungba ket nung ozüng alema amshiba prangbong ka aser injang ngutetba sülen pua liasü.

Aija alisang ya Imphal East kübok Bamon Kampu Mayai Leikai tesem nung alir Thokchom Rajesh Meitei ta

jangjaogo. Pa ya Irilbung police station kübok Bamon Kampu Makha Leikai tesem nung pua liasü.

Teti ama meita aoba sentong benoka inyakba mapang police-i iba nisungba aser pai ania aliba gari sota liasü.

Bushisüngdangba mapang police-i .32 pistol ka den magazine ka aser .32mm injang ka, 7.62x30mm AK rifle injang ka, two-wheeler ka aser

tashishitsü aketba kuli kakat kar nguteta liasü.

Prangbong indang kuli kakat ashishiba mapang Meitei-i kuli kakat kecha mesayutet.

Meitei apuba sülen police ket nung ayu aser Arms Act, 1959 kübok aitsüogo. Aija alisang den pa ket nungi ngutetba prangbong aser injangtem ya Irilbung police station nem bendanga agütsüogo aser maneni bushisüngdangtsü.

Trump-i Putin dang yimjung alitsü ayongzükba memulungi Kyiv amak



Drone amshia Kyiv amakba mapang ki ka kanga mejungi raksatsür aliba noksa ka angur.

Kyiv, Chiteni/July 04 (Agencies): Yasüing Russia nungeri linük yimtiba nung district ajunga amai nung amakba sülen Hokulbarnep Kyiv anünglen mokozi tanak lir, ta Ukraine ketdangsür temi ashir.

Air defence prangbong ola, anünglen drones yimzüba aser ola tulu adoka apokba ajanga ano Ukraine yimtiba semdanga liasü. Ammang tepiyong amakba mapang Russia-i drones 550 aser missiles 11 khaloktsü, ta Ukraine-i ashir.

US Tir Donald Trump aser Russia Tir Vladimir Putin tsüngta phone ajanga jembiba sülen, Putin-i Ukraine den raraba tembangtsü renema mali aser iba yong ni mepelar, Trump-i shir ghonda ishika lir Kyiv ya amak.

Iba sülen Ukraine-i drone amshia Russia nung amakdang tetsür ka asü, ta ketdangsür temi ashir.

Russia south tsütsü Rostov region indang acting governor-i ashiba agi, tetsürla ya Ukraine den arütsü nungi kanga talangkabo mepilai aliba yimtsüng ka nung amakdang asü.

Russia-i ammag agi sangwa kuma tayimtsü amshia amakba nung ano otsü yanglushiogo aser drones 550 yokba nungi air defences alema 72 aita liasü, koba taoba Honibar aonung otsü yanglua drones 537 khalokja liasü, ta

Ukraine indang air force ajanga ashir.

Air raid alerts ola ghonda ti dak tema agüja liasü, kechiaser Kyiv nung waves ishiben agi kongshia amak, koba nükjidong tongtiba liasü, ta air force ajanga Telegram nung ashir.

Ukraine Tir Volodymyr Zelenskyy-ia rara tenzüker tashi sayua amakba tulutiba liasü ta aitsü.

Putin-i Trump den jembiba sülen iba ya atalok aser "Russia-i ano maneni iba rara tembangtsü bilema maliba sayuogo," ta ashir.

Pai tembar linüktem - talisa US dang Moscow tali ajungshitsü aser temerenshi tuluba agütsütsü ayongzuka liasü.

Ukraine indang state emergency service ajanga social media nung video prokshiba nung Russia-i ammag piyong amakba sülen firefighter temi Kyiv nung mi remseptsü merangba sayua liasü.

Kyiv nung Brehostibar aonung amakba nung nisung 23 yiru, railway infrastructure raksatsü, school, ki aser gari nung mi jangru, ta Ukraine ketdangsür temi ashir. Poland foreign minister Radoslaw Sikorski-i ashiba agi, Polish embassy-a raksatsüogo.

Kasa mapang Russia-i Sumy, Kharkiv aser Chernihiv region tem nunga maka liasü.

Hopta ishika tsüngta Russia-

i tayimtsü amshia Ukraine makyonga aruba rongnung Hokulbarnep amakba ya tesüsaba alitsü aser ceasefire atema jembiba nung terenlok kecha makar.

Russia-i tashi ajak amshia February 2022 nungi amak tenzüker Ukraine nung rara ya küm asem dak tema lir.

Brehostibarnü Putin den sensaksemba sülen, rara tembangtsü asoshi terenlok kecha maka, ta Trump-i ashir.

"Tanü ni Tir Putin den sensaksemba asoshi ni kanga mepelar, kechiaser pa yangji lira ma ni mebilemer, aser ni kanga mepelar," ta Trump-i ashir.

"Pai anentsü mebilemer ama ni angateter, aser aji kanga majung," ta pai ashir.

Kremlin-i Ukraine nung rara tenzüker tera kakteta indoktsü maneni merangtsü ta nenshia ashir.

Putin indang odongtar Dmitry Peskov-i Hokulbarnü Trump-i ashiba nung telangzüba agütsüdang, political-diplomatic yimya nung Russia nükjidong metongtet tashi onoki "Special Military Operation" agitsü," ta Russia-i Ukraine amakba nüngja amshia ashir.

Kasa mapang Tir Zelenskyy-i Trump den US-i nok-nü agütsütsü asoshi jembitsü imlar ta ashir, koba air defences nung amshiba densema Ukraine nem tongtipang nok-nü shipments kar Washington-i soita ayutsü telemtetba agia lir.

Iba mera ajanga Russia-i tayimtsü amshia amakba aser arütsülen tesem agiyonga aruba nung Ukraine kumzüka alitsü tashi ajema kumdaktsütsü, ta Kyiv-i shia lir.

Trump-i osangbener den jembidang, onoki nok-nü agütsür aser onoki nok-nü ajakbo soita mali ta ashir. Taoba tir Joe Biden-i asen linük ajak tazüngla kuma parnok nem nok-nü agütsüogo, aser asenok peria asen ket nunga alitsü nüngdaker, ta Trump-i ashir.



OFFICE OF THE
CHANGTONGYA KAKETSHIR TELUNGJEM
P.O- CHANGTONGYA :DIST - MOKOKCHUNG :NAGALAND

TENUNGSANG AGUTSUR



Changtongya Kaketshir Telungjem ajanga Wb.S.Mapu Jamir aser Wt.Temsulemla Lkr na jala, **Kr.Lanusenla Jamir** ajanga NSSB tatidang nung LDA cum Computer Assistant (District) , Department of Evaluation jenjang ngutetba asoshi tenungsang agütsür.

Tsüngremi ne taküm aser wadang maneni moajangma.

Sd/-
Sp. Arensashi
President, CKT

Sd/-
Kr. Sashilemla
General Secy., CKT



CENTRAL COUNCIL FOR RESEARCH IN AYURVEDIC SCIENCES
Ministry of AYUSH, Government of India
J.I.N.B.C.E.H. Anusadhan Bhawan
No. 61-65, Institutional Area, Opp. "D" Block, Janakpuri, New Delhi - 110058
Email : dg-ccras@nic.in, Website : www.ccraa.nic.in
Tel : 011-28525852

ADVERTISEMENT - 2025
PANCHAKARMA TECHNICIAN COURSE

Central Council for Research in Ayurvedic Sciences (CCRAS), Ministry of AYUSH, Govt. of India ajanga class 12 pass sür aliba kaketshirtem küm ka atema, full time aser pei sasa sen indoka Panchakarma Technician Course agitsü application meshir. Iba course ya CCRAS, Ministry of AYUSH, Govt. of India, New Delhi ajanga Healthcare Sector Skill Council (HSSC) nung affiliate süa aliba Training Centres pezü - National Skill Development Corporation (NSDC) i.e. (1) CARI, New Delhi (10 Seats), (2) NARIP, Cheruthuruthy (30 Seats), (3) RARI, Jammu (15 Seats) & (4) CARI, Guwahati (10 Seats) nung agitsü.

Advertisement, Application Form, Course, komasür apply asütsü, Course Fee, arshi küm tatakzük, Reservation aser application agizüktsü atema anogo tatem amala osang tejangja Council indang website www.ccraa.nic.in nung angutsü.

CBC - 17216/12/0006/2526 Administrative Officer (Estt.)

Pakistan army-i Afghan arütsülen telungpur 30 tepset

North Waziristan, Chiteni/ July 04 (Agencies): Pakistan army temi Afghanistan nungi arütsü alema aittsü merangba telungpur 30 tepset ta shiogo. Kasa region nung takum bendanga agütsür amakba nung Pakistan nung sepai 16 tepseter anogo ishika lir iba osang ya angashir.

Tesüiba anogo asem tsüngta telungpur ajunga ya tepset aser parnok ya Pakistan Taliban mesüra parnok den sendaktepa alirtem lir ta Pakistan mitkari ashir aser Hokulbarnü lendong tuluka nungi kumzükogo, ta tenüng asang.

Pakistan Taliban indang faction ka, koba Afghan Taliban nungia telok balaka lir, parnoki taoba hopta Khyber Pakhtunkhwa province kübok North Waziristan district nung takum bendanga agütsür amakba tenüng agia liasü.

Pakistan army temi telungpurtem tepsetba ya kasa district nungi lir.

Linük indang mitkar nungi sangdong ka agütsüba nunga telungpur anema parnok operation agiba tejangja magütsü, saka palrnoki nok-nü, injang aser tapoktsü oset jenti ngutet, ta ashir.

Hokulbarnü Pakistan Ato Kilonser Shehbaz Sharif-ia par linük indang security forces tenüng sanga liasü.

"Linük nungi kiralongra tabu

ajak samatsütsü temlungtetba nung onok lir," ta pa indang office ajanga ashir.

Ato kilonser aser army indang sangdong ajanga India-i telungpur yarir ta tenüng asen.

Tang tesüsa tai tongloksüba nung New Delhi-i telangzüba kecha agüja mali, saka taoba mapanga parnoki Pakistan nung azüdokshitsü ajungmesor ta Islamabad-i maneni jembiba parnoki magizük.

Iba ama tai tongloksüba ya tang ita ishika tsüngta tali kumogo aser nuclear nok-nü aliba kidanger linük ana tsüngta tensa tamajungba lir.

May ita linük ana tsüngta anogo pezü raraba mapang anatsülen nungi nisung 70 asü aser tera agi tashi ajak amshia rara metenzük.

Mangatetep aliba Kashmir region nung April 22 nü nisung 26 tepsetertem Pakistan-i yarir ta India-i tai tongloksüba sülen rara tenzüker. Islamabad-i shilem kecha agia mali ta ashir.


2021 küm Afghanistan nung Taliban-i yimten tashi rakzükba sülen Pakistan arütsülen azüdokshi tali kumogo aser küm ter dak tema nung taoba küm tamajungtiba liasü.

June ita Pakistan sorkari defence nung sen indokba shilem 20 agi timba akum, koba linük indang budget shilem 14 army asoshi alitsü.



Rome, Chiteni/July 04 (Agencies): Hokulbarnep Rome anüdoklen gas station ka poksaba nung nisung 21 yiru. Yangji aliba ketdangsür temi ashiba agi, iba lendong ya Rome anüdoklen Prenestino district kübok Via Gordiani nung aliba gas station ka nung atalok. Iba lendong nung yirur kata kanga sashia yirubabo mali saka nisung pongu mozü kidang anepalutar. Yirur alirtem rongnung karbo rescue workers tem dena lir. Tanker truck ka nungi pump agizükdang iba lendong ya atalok südi, ta yangji aliba fire department ajanga tang tashinung bushiteta lir. Ano ketdangsür temi maneni iba lendong bushisüngdangba mapang lir.

Srikanth, Valishetty & Sankar quarters-i iogo



Kidambi Srikanth



Shriyanshi Valishetty



Sankar Subramanian

Chiteni/July 4, 2025 (Agencies): Tang asaya aliba Canada Open 2025 nung India nunger asema kanga junga asaya quarterfinals tongtetogo.

Kidambi Srikanth, Shriyanshi Valishetty, aser S Sankar Muthusamy Subramanian nunger ajaki Round of 16 asaya nung pei tata asaya straight-game nung koka liasü.

Taoba mapang World No. 1 asayar Srikanth, shiba taküm küm tetenzüklen Malaysia Masters Super 500

nung tanabuba jenjang nung tembanga liasü, pai Round of 16 asaya nung nung Wang Po-Wei 21-19, 21-14 agi koka liasü.

Tena tsüingda minute 40 asaya liasü. Quarterfinal nung

CANADA OPEN

Srikanth top seed aser tang World No. 6 asayar Chou Tien-Chen den asayatsü.

Kasa asayamung tetsür kija asaya nung arishi küm 18 tain Valishetty-i Ontario nung iba asayamung nung maneni kanga junga asaya-a Malay-

sia tsür Karupathevan Letshanaa 21-15, 21-14 agi kokogo.

La quarter-final nung Denmark tsür Amalie Schulz den asayatsü.

Maneni tebur kija asaya nung arishi küm 21 tain Subramanian-i Chinese Taipei nunger asayar Huang Yu-Kai 21-19, 21-14 agi straight game nung kokogo.

Pa Canada Open 2025 tebur kija asaya quarter-final nung third seed aser World Number 12 Japan nunger asayar Kenta Nishimoto den asayatsü.

SL-i India nunger football asayatem meyarir: Stimac


Chiteni/July 4, 2025 (Agencies): Taoba India football team coach Igor Stimac, shiba taoba küm All India Football Federation (AIFF)-i mapa nungi anenja pa melena Manolo Marquez shima liasü, pai ashiba agi, asaya ti dang asayaba sülen Spain nunger coach yagi mapa toktsüba ya kecha taoksatsü mali. Marquez-i Bodhbarnü India football team coach mapa toktsüogo.

"AIFF ya kechi inyaksü aser koda inyaksü mejangjai kanga mejungi achaayanger," ta Stimac-i TOI dang ashi.

Stimac, shiba India team World Cup qualifiers nung tsükba sülen mapa nungi anenja liasü, pa nem AIFF-i compensation sen lakh pezü agütsü, kechiyong pa den tenangzüktepba yangluba küm ka anunga liasü.

India team 2023 küm world ranking 102 nung aliba 2025 küm 127 tashi asepzüka aluba indang jembiba mapang taoba mapang Croatia nunger international asayar yagi ashiba agi, Indian Super League amala asayamungtem ajanga India nunger asayatem parnok tasa tajungba mekümdaktsür.

"ISL amala league tem ajanga asayatem parnok asaya yimya merenlokaktsür, kechiyong item asayamungtem ya kecha



tenongshiba makai ayong ayonga asayar. Iba den leagur nung relegation-a mali aser jenjang aketba asayatem masayar," ta Stimac-i ashi.

Paisa, national team renemtsü atema mapang peria mangur, ta ashi. "FIFA windows ya talang masü aser team tashi taittem den asayatsü mapang renmshitsü atema mapang peria mangur. Anungji AIFF-i national team ajangzükdaktsüsü atema ISL calendar yanglushitsüla," ta pai ashi.

Maneni Stimac-i, India nunger football asayatem pei anisüngzüka aliba tesem toktsür adoktsüla ta ashi. "ISL nung asaya dak malang itasen agütsüba ajanga asayatem comfort zone ka nung toktsür. Anungji parnok timbaka parnok indang career tetenzüklen bangdaka ayur aser club mapa dak dang rangloker inyaker," ta Stimac-i ashi.

Williams-i küm 10 atema tenangzüktepba yangluogo



Chiteni/July 4, 2025 (Agencies): Spain nunger winger Nico Williams-i Athletic Bilbao den küm 10 atema tenangzüktepba ka yangluogo.

Arishi küm 22 tain asayar ya Barcelona-i aotsü atema sendaktepa aruogo aser kasa mapang nung German club Bayern Munich-ia pa alizüksü tejengraba aliba lemsatepa liasü.

Pai taoba mapang Bilbao den tenangzüktepba yanglur aliba ya 2027 küm tembangtsü liasü, saka tang pa 2035 küm June 30 tashi iba club nungi asayatsü atema t e n a n g z ü k t e p b a yanglushiogo.

Spanish club yagi ashiba agi, Williams indang release clause €62m (£53m) aliba shilem 50 agi timba kümogo.

"Telemtetba ka agitsü mapang kü atemabo kü

mulungi kechi ashir aji tongtibangba. Kü nüburtem kong lir idakji ni lir, iba ya kü ki lir," ta Williams-i ashi.

Williams ya Bilbao nungi anitetba asayar ka lir, kong teti Inaki-a asayar. Pa arishi küm 18 asüba mapang 2021 küm April ita club nungi mezüingbuba asaya liasü.

Pai club tenüng nungi asayaba mapang tang tashi nung asaya 167 nung goal 31 idaktsür lir, aser taoba season par team jenjang pezübuba tongteta 2025-26 Champions League atema qualify süa asayaba nung pai teyari tulu agüja liasü.

Williams-isa, Euro 2024 nung Spain-i final nung goal 2-1 agi England akokba asaya nung goal ka idakja par team takok dangi ani.

Barcelona aser Williams na tenangzüktepba yanglutsü ana nung lir ta osang

prokshiba sülen Athletic fans temi Nico Williams aser Inaki na indang mural nungi Williams noksa itokja liasü.

Athletic-i, asayar alizüksü atema Barcelona tashi indang jangjatsü atema La Liga den ajurutepego, ta ashiba sülen hopta ka lir tang iba tenangzüktepba ya yangluogo.

Inter School Badminton asayamung tenzükogo

Dimapur, Chiteni/July 4 (TYO): 2buba Chumoukedima District Inter School Badminton Tournament July 4 nü Testo College nung tenzükogo.

Asayamung lapokba sentong nung lokti pela agizükba o jembiba mapang Chumoukedima District Badminton Association (CDBA) tir Seyietuo Yashu-i, iba asayamung ya asaya nung sempet aliba sayutsüba atema dang masü saka asayamung ya discipline, bendanga agütsüba aser sportsmanship benjungtsü atema lir, ta ashi.

Saisabong ajanga asen taküm yimyattem melenshir, telungjem adokdaktsür aser lanurtem tajung asoshi kati ka den tokteptsü atema ajungmesor ta shia pai asayamung nung shilem

agirtem dang ochishia aser kati ka akümtsübutepa aser ketdangsürtem akümtsübuta takok tashi meranga asayatsü ajungshia liasü.

Temetetsü kaji iba asayamung nung Chumoukedima district kübok school 26 nungi asayar 350 shi-i shilem agidar. Asayamung ya

anogo ana tashi category balala küm lemsar asayatsü. Tournament Head Referee Imtilong Longkumer-i asayamung indang temzüng ozüng metetdaktsüba den pai achaayanga asayatem tenangzüktepba agi. Iba sentong ya Chemdila Mongzar lenisüba nung agia liasü.



BILEMDANGANG

"Melenshibaji alizung atongba masü saka tetenzükdak lir."